



ATASSUT

UKA 2015/150,152,152,157,158 & 159

Siverth K. Heilmann

10. 11. 2015

Siunnersuut: Inatsisartut aalajangiiffigisassaattut siunnersuut Namminersorlutik Oqartussat akuersissutigissagaat Nunarsuarmioqatigiit ataatsimoorussamik isumaqatigiissutaat radioaktiviussut ikummatikut aamma radioaktiviussut eqqagassat isumannaatsumik isumagineqartarnissaat pillugit (Eqqagassalerinermut isumaqatigiissut)

Uunga siunnersuut: Atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiortoqalersillugu ikiuunnissaq pillugu IAEA-imi nunani tamalaani isumaqatigiissummut (Ikiuunnissamut nunani tamalaani isumaqatigiissut) Namminersorlutik Oqartussat akuersinissaat pillugu oqaaseqaateqarnissaq pillugu Inatsisartut aalajangiiffigisassaattut siunnersuut

Siunnersuut: Inatsisartut aalajangiiffigisassaattut siunnersuut Namminersorlutik Oqartussat akuersissutigigaat Atom-ip nukinganik sakkoqarluni pinerliiniartoqartarneranut akiunermut Nunarsuarmioqatigiit isumaqatigiissutaat

Siunnersuut: Inatsisartut aalajangiiffigisassaattut siunnersuut Namminersorlutik Oqartussat akuersissutigissagaat International Labour Organization – ILO -p isumaqatigiissutaa nr. 115, sulisartut qinngornernut ingerlaartunut (ioniserende) illersorneqarnissaat pillugu isumaqatigiissutaasoq akuersissutigineqassasoq

Uunga siunnersuut: IAEA-imi atomip nukinganit atortussianik inissisimaffiini isumannaarinissaq pillugu nunani tamalaani isumaqatigiissummut allannguummut Namminersorlutik Oqartussat akuersinissaat pillugu oqaaseqaateqarnissaq pillugu Inatsisartut aalajangiiffigisassaattut siunnersuut

Uunga siunnersuut: Atomip nukinganut isumannaallisaaneq pillugu IAEA-imi nunani tamalaani isumaqatigiissummut Namminersorlutik Oqartussat akuersinissaat pillugu oqaaseqaateqarnissaq pillugu Inatsisartut aalajangiiffigisassaattut siunnersuut

(Inuussutissarsionermut, Suliffeqarnermut, Niuernermut Nunanullu Allanut Naalakkersuisoq)

Inatsisartut aalajangiiffigisassaattut siunnersuutit arfinillit Namminersorlutik Oqartussat isumaqatigiissutinut assigiinngitsunut akuersillutik oqaaseqaateqarnissaat arlaatigut tamarmik qinngornernik ulorianartunik akulinnut atatillugu sillimaniarnermut aammalu isumannaatsumik isumaginninnissamut aalangersaanernut, ullumikkut Danmark-imi atuutinneqartuli sulili Kalaallit Nunaannut atuutinneqalersimanngitsut.



Siunnersuutit pilersinneqarsimapput Danmark-ip aamma Kalaallit Nunaata ataatsimoorussamik Kalaallit Nunaanniit uranimik piiakkamik akuutissanillu allanik radioaktiviussunik piiaanermi nunanullu allanut niueruteqarneq pillugu nalunaarusiornerup oktobari 2013-imi naammassisap kinguneranik.

Siunnersuutit pineqartut ATASSUT-mit pissusissamisut Kalaallit Nunaata aatsitassarsiornikkut annerusumik nunap pissarititaannit uumaatsunik atorluaanerulerusunnermut kissaataannut, tassalu uuliasiornerup aatsitassarsiornerrullu Kalaallit Nunaanni ineriartortinneqarnissaannut. Taamaattorli uran pillugu oqallittarnerni, innuttaasut peqataatinneqarnerannut aammalu kattuffinni assigiinngitsuniit qisuariaataasarsimasut eqqarsaatigalugit eqqumiiginarpoq, siunnersuutit tusarniaassutigineqarnerinut atatillugu ataasinnguamilluunniit tusarniaanermi qisuariaateqarsimangimmat, naak siunnersuutit piffissami 12. Juuni-miit 6. Aggusti 2015-p tungaanut tusarniaavimmiissimangaluartut – tassunga atatillugu ATASSUT-mit soqutiginarparput tusassallugit Naalakkersuisut arlaatigut tamatumap nassuiaatissaqartinneraa taamatut siunnersuutinut soqutiginninnerup annikitsigisimanerinut?

Taava aamma ATASSUT-mit neriuutigaarput, taamatut siunnersuutit saqqummiunneratigut aamma qulakkeerneqarsimassasut eqqumaffigineqarlutillu nalunaarusiap oktobari 2013-imi naammasseereernerata kingorna inatsisinut nutaanut imaluunniit inatsisit allanngortinneqarsimasunut arlaatigut aporfeqalersimassanngitsut.

Taamatuttaaq ATASSUT-mit neriuutigaarput, Inatsisartut siunnersuutini pineqartunik akuersineratigut, nunarsuarmioqatitsinnut takutissagipput, Kalaallit Nunaata namminersortutut nunap assigiinngitsunik aatsitassarsiorfittut ineriartortitserusunnini pimoorullugu suliniuteqartuunini.

Taamatut ATASSUT-mit oqaaseqarluta Naalakkersuisut isumaqatigiissutinut assigiinngitsunut pineqartunut ilanngunnissamut inassuteqaatai taperserpavut.